

HAUTESKUNDE LEGEA. Biltzar Nagusietarako hauteskunde legea aldatzeko EAJk eta EAK duela astebete aurkeztutako proposamenak sortutako polemikaren eraginez, bi alderdiok atzera egin eta maiatzeko hauteskundearen ostean eztabaidatzea nahi dute.

Hauteskunde legearen aldaketa bozak igaro arte atzeratzea erabaki dute EAJk eta EAK

Maiatzeko udal eta foru hauteskundeak igaro arte ekimena ez eztabaidatzea eskatu dute bi alderdiek, «hauteskunde interesik» ez dutela erakutsi nahia argudiatuta

Eduñe Begiristain | GASTEIZ

EAJk eta EAK atzera egin dute, eta Biltzar Nagusietarako hauteskunde legea aldatzeko proposamena maiatzeko udal eta foru hauteskundearen ostera arte ez eztabaidatzea proposatu dute. Bi alderdiok ustekabean iragarri zuten atzo duela astebetetik hona horrenbeste zeresan eman duen asmo horri behin behineko uko egiten diotela.

EAJko bozeramaile Joseba Egibarrek eta EAKo Antolakuntza idazkari Rafa Larreinak hartutako erabakiaren berri eman zuten atzo, Eusko Legebiltzarrean, eztabaida atzeratzeko eskaera Mahaian aurkeztu ondotik. Haiekin batera, Iñaki Gerenabarrena eta Manuel Ibarrondo Arabako EAJko eta EAKo presidenteak hurrenez hurren egon ziren, prentsa aretoan. Azaldu zuten, erabaki horrekin agerian utzi nahi dute beren ekimenarekin ez dutela hauteskunde interesik bilatzen eta ez direla inolako «amarrurik» egiten ari.

Hala adierazi zuen Joseba Egibarrek: «Norbaitek hauteskunde etekinak lortzea leporatzen bazigun, orain kanpo gertatzen da, eta norberak bere jarra erakutsi beharko du». EAJko eta EAKo ordezkariak aurkeztutako erreforma defendatu zuten beste behin ere, eta Arabako koadrilen ordezkariak dagoen «gabezia» ekiditeko ekimena dela iritzi zioten. Larreinak, esaterako, argi utzi zuen hauteskunde legearen aldaketa eztabaida «demokratikoa, zilegia, logikoa eta zentzuduna» dela, Arabako koadrilek egiten duten eskaerari erantzuna eman nahi diolako.

Legearen aldaketaren eztabaida behin behineko alde batera utzi arren, Egibarrek eta Larreinak azpimarratu zuten hauteskundearen ostean atzera ere helduko diotela gaiari. Egibarrek ohartarazi zuen «nahi ala ez» legearen erreforma maiatzeko hauteskunde kanpainaren eztabaida izango dela, eta ondoren Eusko Legebiltzarrean ere eztabaidatuko dutela.

Bestalde, Iñaki Gerenabarrena eta Manuel Ibarrondo ziur agertu ziren EAJk eta EAK datozen hauteskundeak irabaziko dituztela, sistema bat zein bestea erabilita.

EAJko EBBko idazkari Josune Ariztondoren iritziz, ordea, ekimena atzeratzeko arrazoi nagusia Eusko Legebiltzarrean



RAUL BOGAJO / ARGAZKI PRESS

Iñaki Gerenabarrena, Joseba Egibar, Rafa Larreina eta Manuel Ibarrondo, EAJko eta EAKo ordezkariak, erabakiaren berri eman zutenean.

SOZIALISTA ABERTZALEAK

Batzar Nagusietatik Eusko Legebiltzarrera

Araba, Bizkaia eta Gipuzkoako Sozialista Abertzaleak taldeko legebiltzarkide Antton Morcillok atzo iragarri zuen bere taldeak hauteskunde legea aldatzeko mozioa aurkeztuko duela hilaren 17an Arabako Biltzar Nagusietan, eta bertan eztabaidatu ostean, Eusko Legebiltzarrean eramango dutela. Morcillok gogorazi zuen bere taldeak betidanik proposatu duela 1983ko legeak zehazten duen hauteskunde-barrutien eredura bueltatzea, eta hori dela eta aurkeztu zutela Biltzar Nagusietan ekimena. Morcilloren aburuz,

gainera, lege hori eztabaidatzeko lekua Biltzar Nagusiak dira, eta bertan eztabaidatu ondotik, EAEko Legebiltzarrean ekimen bera aurkeztuko dutela esan zuen.

Biltzar Nagusietan aurkeztutako mozioak 83ko eredura itzultzea eskatzeaz gain, Arabako Biltzar Nagusiei eskatu egiten die koadrilek Arabako erakundetzearen barruan izan behar duten papera erabat zehazteko eztabaida sakon eta zabala bueltatzea.

Bestalde, Morcillok EAJren eta EAKen jarrera kritikatu zuen eta «seriotasun falta» izatea leporatu, «egun batetik bestera eztabaida piztu eta astebetean ezerezean utzi dutelako». Era berean, «eztabaida faltsua» piztea egotzi zien bi alderdiei, Espai-

niaren aurrean «polarizazioa» dagoela azaldu nahi dutela argudiatuta. «Hori ez da serioa, ez da politika egiteko modua», salatu zuen.

EAJk eta EAK herritarren interesak erabiltzen dituztela eta hauteskunde egoeraren arabera jokatu dutela gaitzetsi zuen Sozialista Abertzaleak taldeko legebiltzarkideak. «Lotsagarria da EAJk eta EAK akats historiko bat konpontzeko eskatzea, 1987az geroztik beren konpromisoa urratzen aritu direnean», kritikatu zuen. Bere aburuz, EAJren nahia da eztabaida «artifiziala» berpiztea, eta Arabako koadrilen ordezkariak «alderdikoia» egitea. «Hori da EAJk egiten duen politika», gaineratu zuen.